



ВЫЛЬ СІЗЕН



ОТДЕЛ
РЕЛИГИОЗНОГО
ОБРАЗОВАНИЯ

ПАВЕЛ АПОСТОЛЛЭН
КОРИНФ КАРЫН УЛЙСЬЁСЛЫ
ЫСТЭМ КЫКЕТЙ ГОЖТЭТЭЗ

1-тй ЛЮКЕТ

¹Павеллэсь, Инмарлэн эрикеныз быръем Иисус Христослэн апостолэзлэсь но Тимофей братлэсь – Коринфысь черклы, быдэс Ахаияысь ваньмызлы вöсьяськисьёслы: ²асьмелэн Инмар Атаймылэсь но Кузё-Инмарлэсь Иисус Христослэсь тйледлы дэ-лето улон, каньыллык сйзисько.

³Дан Инмарлы, Кузё-Инмармылэн Иисус Христослэн Атаезлы, гажан-жаляялэн Атаезлы, котькыче буйгатсконлэн Инмарезлы. ⁴Котькыче куректон-кайгуосмы дыръя Со асьмеды буйгатэ, асьмеос но котькыче куректон-кайгуэ сюремьёсты Инмарлэн асьмелы сётэм буйгатонэныз буйгатыны мед быгатомы шуыса. ⁵Уго кызы асьме пушкын Христослэн курадзоньёсыз йыло, озы ик Христос пыр басьтэм буйгатсконмы но йылэ. ⁶Куректйськомы-кайгыриськомы-а ми, – тйляд буйгатсконды, утиськонды понна куректйськомы-кайгыриськомы, кудйз тйледлы юрттэ ми кадь ик курадзоньёсты чиданы. ⁷Тй вылэ ми юн оскиськомы. Буйгатекиськомы-а ми – тйляд буйгатсконды, утиськонды понна буйгатекиськомы, уго ми тодйськомы курадзоньёсмы гинэ öвöл, буйгатсконмы но асьмелэн одйг кадь. ⁸Агай-выньёсы, милям уг поты Асиын милемын луэм секытлыкьёс

пумысен тйледыз тодытытэк кельтэммы, малы ке шуоно, ми туж зол, чиданы луонтэм куректон-кайгу аджоно луимы. Ум но малпаське ни вал, улэп кылёмы шуыса. ⁹Виыны сётэм муртъёс кадь ми асьмелы асьмеос потйськомы ни вал, соин ик ми асьме вылэ өм ни оскиське, кулэмьёсты улзйтйсь Инмарлы гинэ оскиськимы на. ¹⁰Шимес кулонлэсь Инмар милемыз мозмытэ. Азьланяз но мозмытоз, ми Со вылэ оскиськиськомы, Со милемыз уте. ¹¹Тй но милемлы вöсяськыса юрт-тйськиды ке, соку трос аядмиос ми понна Инмарлы тау карон кылёс вералозы, – уго Инмар трос муртлэсь вöсяськемзэ кылзйськыса, милемлы туж бадзым гажан-жалянзэ возматйз.

¹²Тани ми маин ушьяськиськомы: чылкыт сюлмын вераны быгатйськомы, кызыы ми тй дорын сямен ик, дунне вылын пöяськытэк, огшоры гинэ, кызыы кулэ Инмарлы, озыы улйськомы; та дуннелэн визьлыкеныз öвöl, Инмарлэн сётэм дэлэтэныз улйськомы. ¹³Мае тй лыдзиськоды, мае валаськоды – сое ук ми тйледлы гожтйськомы, мукетсэ ум гожтйське. Мон оскисько, тй милемыз пумозяз валалоды шуыса, ¹⁴öжытак валады ни бере. Соку Кузё-Инмармылэн Иисус Христослэн лыктон нуналаз тй милемын, ми тйледын ушьяськыны мед быгатомы.

¹⁵Соин ик, талы оскыса, мон азьвылгес тй доры лыктыны малпасько вал ни, кыкетй ползэ дэлэт мед басьтоды шуыса. ¹⁶Македонияе мыныкум, Македонияысь берытскыкум но тй доры пыраны малпасько вал. Собере тй монэ Иудеяе келясалды.

¹⁷Та малпанме, оло, капчи визьем мурт кадь-а мон лэсьтй? Мар ке лэсьтыны кутскисько ке, оло нош, ас тодэмым лэсьтйсько, – одйг дыре ик, ”вань, вань!”, соку ик ”өвөл, өвөл” шуисько? ¹⁸Инмар оскиськымон бере, – ми ноку но одйг дыре ик ”вань!” но ”өвөл!” тйледлы ум шуэ. ¹⁹Уго тй дорын – монэн, Силуанэн но Тимофеен тодытэм Инмар Пи Иисус Христос огдыре ик луыны уг быгаты ”вань” но, ”өвөл” но. Иисус Христослэн котьку но ”вань!”, – ²⁰Инмарлэн вань сйземьёсызлы Христос котьку ”вань!”. Соин ик Христос пыр асьмеос Инмарлэн данэзлы ”аминь” шуиськомы. ²¹Инмар асьмеды Христос бордын юнматэ, Со асьмеды вöйын зырзиз. ²²Аслаз печатеныз асьмеды пусйиз но асьмелэн сюлмамы Духсэ ыстйз – сётэм кылзэ быдэстоз шуыса оскытйз.

²³Инмарез лулылы адзись луыны öтисько; тйледыз жаляса мон та дырозь Коринфе öй ни вуылы. ²⁴Та уг возматы тйляд осконэныды ми кузёясыкыны кутскиськомы шуыса; тй осконын юн сылйськоды, ми юрттйськомы тйледлы шумпотон вайыны.

2-тй ЛЮКЕТ

¹Ас поннам ачим малпай: нош ик жоже уськытон вайыса азыланяз тй доры лыктоно өвөл ни. ²Уго, мон тйледыз жоже уськытйсько ке, соку кин монэ шумпоттоз, со ик уз-а, кинэ мон жоже уськытй? ³Та сярись мон тйледлы соин гожъяй: лыктэм

берам монэ жоже медаз уськытэ соос, киньёс монэ шумпоттыны кулэ вал. Мон уго оскисько, – мынам шумпотонэ тй понна но шумпотон луэ шуыса. ⁴Туж бадзым куректон-кайгуэн, сюзэм бёрдонэн, трос синву кисьтыса мон тйледлы гожьяй, но со тйледыз жоже уськытон понна өвёл, – сое мон яратэмме-гажамме тй мед тододы шуыса гожьяй, уго тйледыз яратонэ-гажанэ пачылмыса улэ.

⁵Кин ке но монэ жоже уськытйз ик ке, со монэ жоже өз уськыты, тйледыз ваньнадэс со ожытак ке но жожомытйз. ⁶Та адями понна тырмыт ини трос муртъёслэн сое вось каронзы. ⁷Соин ик, укыр бадзым куректонэн ёртэмын медаз луы шуыса, тйледлы умойгес луоз солэсь сьöлыксэ куштыны но сое буйгатыны. ⁸Со понна ик тйледыз курисько: солы асьтэлэсь яратондэс возматэ! ⁹Со понна но мон гожтй уго: котьма ласянь но тйлесьтыд кылзйськисесь луэмдэс эскерон-чаклан понна. ¹⁰Кинлэсь тй сьöлыксэ куштйды, солэсь мон но кушто. Кинлэсь ке но сьöлыксэ мон куштй, вань ке со, – Христос азын тй понна сое мон куштй. ¹¹Шайтан асьмеды вормыса медаз улы, уго солэсь кескич малпаньёссэ-ужьёссэ тодытэк асьмеос ум улйське.

¹²Христос сярысь Зеч Ивор тодытыны мон Троядае лыктй. Соку азысьтым өсме Кузё-Инмар усьтыса дасям вал ни. ¹³Мынам духе буйганы өз быгаты, уго отысь мон Тит братме ой шедьты. Соин ик мон соосын люкиськи но Македонияе кошки. ¹⁴Инмарлы тау, Со котьку но милемды Христос бордын бадзым данэн азылане валтэ но Христос сярысь тодонлэсь ческыт зынзэ котькыче интые

ми пыр вёлмытэ. ¹⁵Уго ми Христослэн Инмар доры жутскем ческыт зыныз луиськомы, – кызы ке утиськонэ, озыы ик быронэ мынйсьёс понна: ¹⁶одйгъёсыз понна асьмеос луиськомы кулон сётйсь кулон зын, нош мукетгъёсызлы – улон сётйсь улон зын. Кин таёе уез жутыны вормоз? ¹⁷Ми уго Инмар кылэн ум вузкарьске, кызы тросэз пайда утчася лэсьто. Öрекчаскытэк, чылкыт сюлмынымы Инмар бордысь потэм кылэз Инмар азын Христосэн ёош тодытйськомы.

3-тй ЛЮКЕТ

¹Ми нош ик асьмеды асьмеос ёектыны кулэ-а? Куд-огъёс кадь ик, оло, ми но тйледлы яке тйлесьтыд оскытйсь гожтэмъёсты кулэ кариськомы? ²Тй – милям гожтэтмы. Со милям сюлмамы гожтэмын; сое вань адымиос тодо, лыдзо. ³Тй асьтэос возматйськоды: тй – Христослэн гожтэтэз луиськоды шуыса. Со гожтэмын милям ужаммы-тыршеммы пыр. Чернилаен өвёл, улэп Инмарлэн Духеныз, из пульёс вылын өвёл, сюлэмлэн мугоро пульёсыз вылын гожтэмъёс тй луиськоды.

⁴Христос пыр Инмар азын милям таёе оскиськонмы вань. ⁵Асьме бордысь потэм малпанэн маке но ёечсэ лэсьтыны быгатйсье мед луысалмы, – озыы өвёл, милям вань быгатонлыкмы Инмар бордысь потэ. ⁶Со милемлы Виль Сйзёнлэн ужась-тыршисьёсыз луыны быгатонлык сётйз, – букваен гожтэм сйзён-косонлы өвёл, Духен сётэм

сйзён-косонлы ужась-тыршись луыны, малы ке шуоно, буква вие, нош Дух улэп улон сётэ.

⁷Букваен изъёс вылэ гожтэм законлы ужан-тыршон, кудйз кулонэ нуэ, сокем данлыко ке вал – уго Израиль пиослэн Моисейлэн данлыкен пиштйсь ымныр шораз учкемзы ик өз луы, нош со пиштон вакчи дырлы гинэ сётэмын вал ке но, –⁸нош соку Духлэн ужан-тыршонэз эшшо но даногес уз луы-а? ⁹Уго суд улэ нуись законлы ужан-тыршон данлыко ке, Инмар азын шонере потонлы ужан-тыршон уката но данолэсь но даногес луэ. ¹⁰Бöрысь вуисезлэн данэз туж бадзым луэмен, азьвыл вылй данъямлэн данэз табере дан кадь но öвöl ни. ¹¹Уго ортчисез-кошкисез сокем дано ке, соку ортчисьтэм-кошкисьтэмлэн данэз уката но бадзым.

¹²Таёе оскиськонмы вань бере, ми чик кышкатэк тыршиськомы. ¹³Но Моисей кадь ум, кудйз ортчись-кошкись данлыклэсь йылзэ-пумзэ Израиль пиос медаз адёе шуыса, ымнырзэ шобыртылйз. ¹⁴Соин ик соослэн визьзы ёксаськемын: уго самой со шобрет та дырозь Вуж Сйзёнэз чирдыку жутэмын уг луы, малы ке шуоно, со шобретэз Христос гинэ басьтыны быгатэ. ¹⁵Моисей законэз чирдыкузы, та нуналозь соослэн сюлэм вылазы шобрет кылле; ¹⁶нош куке адымиослэн сюлэмъёссы Кузё-Инмар пала берытске, соку со шобретэз басьто. ¹⁷Кузё-Инмар – со Дух, нош кытын ке Кузё-Инмарлэн Духез вань, отын эрик. ¹⁸Нош асьмеос ваньнамы шобыртымтэ ымнырен, синучконын кадь Кузё-Инмарлэн пиштйсь дан-

лыкез шоры учкыса воштйськиськомы, Солы укшасесь луиськомы. Асьме пушкын Солэн данэз эшшо но эшшо йылэ, уго со Кузё-Инмар бордысь потэ, Кудйз луэ Дух.

4-тй ЛЮКЕТ

¹Соин ик, Инмар Ас зечлыкеныз милемлы таёе ужан-тыршон сётэм бере, куректыса ми ум ни улйське: ²ватйськыса улйсь возьыттэм ужъёсты кулэтэм кариськомы, кескич-өрекчи ужъёсын ум выриське, Инмар кылэз сураса-пожаса ум улйське. Зэмлыкез ватытэк вераськомы, нокинлэсь ум ваткиське, Инмар азын милемды адямиос судить мед карозы. ³Милям Зеч Ивор тодытонмы кинъёслэсь ке но ворсаськемын ке, со ворсаськемын быронэ мынйсь адямиослэсь гинэ. ⁴Та даурлэн "инмарез" оскисьтэмъёслэсь визьзэс пеймытэн чоксаз, но соин ик Христослэн пиштйсь данлыкез сярысь Зеч Иворлэсь югытсэ соос уг ни адзо, нош Со Инмарлэн тусыз-образэс луэ. ⁵Ми уго асьме сярысь ум тодытйське, ми Иисус Христос Кузё-Инмар луэ шуыса тодытйськомы. Иисус понна ми тйляд ляльчиосты луиськомы. ⁶Малы ке шуоно, Иисус Христос бордысен Инмарлэсь пиштйсь данлыксэ тодон понна, Инмар асьмелэсь сюлэмъёсмес югдытйз. Та Инмар ик уго шуиз: "Пеймытйсь югыт пиштыны мед кутскоз".

⁷Асьмеос горд суйлэсь лэсьтэм сосудъёс гинэ луиськомы, кудъёсыз пушкын та быдза узырлык

возиське; мертантэм бадзым кужым асьме бордысь уг, Инмар бордысь потэ. ⁸Котькуд ласянь ми жикатэмын, но жикамын өвөл. Ми кышкыт учырѐсы сюрыйськомы, но кышкатсконлы ум сётскиське. ⁹Милемыз уйыло-улляло, нош милемыз Инмар уг кушты. Пыд йылысьтымы погыртыло, нош ми али но улэпесь. ¹⁰Иисуслэн улонэз милям мугорамы мед усътйськоз-адзиськоз шуыса, асьмелэн мугорамы котьку но Иисуслэсь кулонзэ нулльськомы. ¹¹Иисуслэн улонэз но милям кулоно мугорамы мед усътйськоз-адзиськоз шуыса, ми улэпѐс, Иисус понна дугдылытэк кулонлы сётскыйськомы. ¹²Озыен, кулон ми пушкын ужа, нош улон – тй пушкын. ¹³Осконлэн духез ми бордын улэ, кудйз сярысь гожтэмын: ”Мон оскыны кутски, соин ик вераны кутски”; ми но оскиськомы, соин ик вераськомы. ¹⁴Тодйськомы, Кузё-Инмарез Иисусэз Улзытйсь асьмеды но Иисус пыр улзытыса Аслаз аяз султытоз шуыса. ¹⁵Уго ваньмыз та тй понна: Инмарлэн дэлетэз трогес но трогес адымиос доры мед вуоз. Соку соос эшшо но золгес тау карыса вöсьяскозы, Инмарлэсь данзэ жутозы.

¹⁶Соин ик ми куректыса ум улйське; мугорын адыми луонмы сисьме ке но, нош лулын адыми луонмы нуналысь нуналэ выльдйське. ¹⁷Уго вакчи дырлы сётйськись капчи курадзонѐсмы лыдьяса быдтонтэм, бырылйсьтэм дан ваё. ¹⁸Ми адскись шоры ум, адскисьтэм шоры учкиськомы: уго адскисез ортчись-кошкись дырлы сётэмын, нош адскисьтэмез – ноку но бырылйсьтэм луэ.

5-тй ЛЮКЕТ

¹Тодйськомы уго, кукке музъем вылысь коркамы, та балаган*, куашкатэмын ке луиз, асьмелэн Инмын, Инмарен сётэм улон интымы вань, – кийн лэсьтымтэ, ноку но бырисьтэм коркамы. ²Татын дыръямы, Инмысь улон юртэн дйсьськеммы потыса, мур лулзылыса улйськомы. ³Только асьмеос дйсьськем дыръямы но голык шуыса медам адзиське вал. ⁴Уго музъем вылысь балаганамы улыку, зйбетлы чидатэк, лулзылйськомы-жуштйськомы, малы ке шуоно, таизэ дйськутмес кылеммы уг поты, выльзэ дйсьяммы потэ – вань кулонозэ-быронозэ улон мед ньылоз. ⁵Самой та понна ик Инмар асьмеды кылдытйз но Духсэ асьмелы сётйз – сётэм кылзэ быдэстоз шуыса оскытйз. ⁶Соин ик ми котьку но сэзь мылкыдоесь; но тодйськомы: мугорен улон дыръямы Кузё-Инмарлы ми кыдёкын улйськомы, – ⁷уго осконэн улйськомы, адзонэн ум улйське. ⁸Сэзь мылкыдын улйськомы, но мылкыд кариськомы мугорысьтымы потыса, Кузё-Инмар доры улыны интыяськыны. ⁹Соин ик, таяз дорамы-а, яке мукетаз дорамы-а улйськомы, Кузё-Инмарлы ярамон луыны тыршиськомы. ¹⁰Уго асьмелы ваньмылы Христослэн судэз азе лыктоно луоз, соку котькудйз адями, мугорын улыкуз зечсэ яке уродзэ лэсьтэмез понна, пунэмзэ басьтоз.

* 5:1 Татын вераськон мынэ адями мугор сярись.

¹¹Кузё-Инмарлэсь кышканэз тодйськомы бере, мукет адямиосты но визьманы тыршиськомы. Нош Инмар тодэ милесьтым кин луэммес, малпасько, тй но тодйськоды милесьтым кин луэммес. ¹²Тй азын асьмеды ушъяны ум малпаське, но ми тйледлы милемын ушъяськыны муг сётйськомы: сюлэм чеберенызы өвёл, вылтусэнызы ушъяськисьёслы маке но пумит вераны мед быгатоды шуыса. ¹³Асьмеды кутыны быгатытэк ми пурзиськомы ке, со Инмар понна; нош зйбытэсь-востэмесь луиськомы ке, – со тй понна. ¹⁴Христослэн яратонэз милемын, тазы малпасьёсын, кивалтэ: одйг Адями ваньмыз понна кулйз ке, соку ваньзы кулйзы. ¹⁵Нош Христос ваньмыз понна кулйз, соин ик улйсьёс асьсэлы медаз ни улэ, мед улозы Со понна, кин соос понна кулйз но улзыса султйз.

¹⁶Соин ик, та дырысен кутскыса, ми нокинэ но адями визьлэн мертэтэныз ум дуньяське. Христосэз азьвыл адями визьлэн мертэтэныз дуньяськомы ке вал, табере озы ум ни дуньяське. ¹⁷Озыен, кин Христос бордын – со выль кылдытэм, – вашкалаез ортчиз, табере ваньмыз выль луиз. ¹⁸Ваньмыз та Инмар бордысь потэмын, асьмеды Со Христос пыр Асэныз тупаса улйсь кариз. Мукет адямиос но Соин тупаса мед улозы шуыса, милемыз со бордын ужаны-тыршыны косйз. ¹⁹Малы ке шуоно, Христос пыр Инмар быдэс дуннеез Асэныз тупаса улйсь кариз. Адямиослы сьöлыкъёс öз гожты, Асэныз тупаса улон сярысь вань адямиослы милемыз ивортыны косйз. ²⁰Ми – Христослэн нимыныз ыстэмъёс, ми пыр Ачиз

Инмар адямиослы вазиське. Христослэн нимыныз тйледыз сюлворыса куриськомы: Инмарен тупатске! ²¹Христос пыр, Инмар азын асьмеос шонер улйсьёс мед луомы шуыса, сьöлыкез Тодйсьтэм былэ Со асьмелэсь сьöлыкьёсмес понйз.

6-тй ЛЮКЕТ

¹Нош ми, Инмарлэн ужасьёсыз-тыршисьёсыз, сюлворыса тйледыз куриськомы: Инмарлэсь басьтэм дэлетты пайдатэк медаз быры. ²Уго Со шуэ: "Зеч вапуме Мон тонэ кылй, утиськон нуналэ Мон тыныд юрттйськи".*

Тани, али со зеч вапум, тани, али со утиськон нунал! ³Милесьтым ужан-тыршонмес медаз куаретэ шуыса, ми нокинлы номырин канжаськон ум пуктылйське. ⁴Котькытын но ми Инмарлэн ужась-тыршисьёсыз луонмылэсь данзэ утыны тыршиськомы: куректон-кайгуосты чидаськомы, курадзоньёсты, ёрмыса, жикаса улоньёсты адзиськомы; ⁵мыжганьёс-тышканьёс улын, пытсэттьёсын, уल्याса возылыкузы, секыт ужаса, уйёссы избытэк, визяса улон дырьёсамы; ⁶дун-чылкыт, визьмын, кема чидаса, лякыт сямын, чылкыт яратонэн, Святой Дух бордын улыса; ⁷зэмлыклен кылыныз, Инмарлэн кужыменыз, бурласянь но, паллян паласен но шонерлыклен пычал-тйрлыкеныз утиськыса; ⁸сийё-сано улонын но, сантэмаса возёнъёс

* 6:2 Ис. 49:8.



дыръя но, тышкаськыса-керетыса улонын но, ушь-
 яса-данъяса возёнъёс дыръя но. Милемыз öрек-
 часькисьёс шуыса лыдъяло, нош ми оскиськы-
 монэсь. ⁹Ми тодмотэмесь, нош милемыз ваньмыз
 тодмало; милемыз кулэмын ни шуыса лыдъяло,
 нош ми улэпесь. ¹⁰Милесьтым көтмес жож каро,
 нош ми котьку но шумпотонэн улйськомы. Ми
 начар улйсьёс, нош троссэ узырмытйськомы.
 Милям номырмы но öвөл, нош ми котьмарлы
 узыресь.

¹¹Коринфын улйсьёс! Милям ымъёсмы тй пон-
 на усътэмын, сюзэммы но тй понна паськыт усъ-
 тэмын. ¹²Тйледлы милемын огазын ёркыт öвөл,
 нош тйледлы асьтэлы сюзэм пушкады ёркыт.
¹³Аслам пинальёсылы кадъ тйледлы верасько: тй
 но ми кадъ ик сюзэмъестэс усътэ.

¹⁴Оскисьтэмъёсын одйг кыткетэ йырдэс эн понэ.
 Уго мар одйг кадез вань шонер улон но законлы
 пумит улон куспын? Мар огкадез вань югыт но
 пеймыт куспын? ¹⁵Христос но Велиар куспын мар
 огъяз вань? Яке мар герзаны быгатоз оскись но
 оскисьтэм муртъёсты? ¹⁶Мар одйг кадез луоз
 Инмарлэн храмез но сульдэръёс-идольёс куспын?
 Тй уго улэп Инмарлэн храмез луйськоды. Ачиз
 Инмар шуиз:

”Соос пушкы улыны пыро но

соосын огазын уло;

Мон соослэн Инмарзы луо,

нош соос Мынам калыке луозы.*

* 6:16 Лев. 26:12.

¹⁷Соин ик, соос пӧлысь потэлэ, соослэсь люкиське, – шуэ Кузё-Инмар, – мар чылкыт ӧвӧл, со борды эн йӧтйське, соку Мон тйледыз кабыл басьто.*

¹⁸Мон тйледлы Атай луо, нош тй Мынам пиосы, нылтёсы луоды, – шуэ Дунне Кутйсь Кузё-Инмар”.

7-тй ЛЮКЕТ

¹Гажаноосы, тйни кычөөсь сйзёнъёс асьмелы сётэмын! Ойдолэ ук, лулмугорез но духез саптась вань юрзым макеослэсь асьмеды сузяломе но Инмарлэсь кышканэн дун-сьӧлыктэм уломе. ²Усьтэлэ милемлы сюзэмдэс. Ми нокинэ но жоже ӧм уськытэ, нокинлы но урод уж ӧм лэсьтэ, нокин бордысь но пайда басьтон утчаса ӧм улэ. ³Тйледыз куаретыса-пыкылыса тае уг вераськы. Азьвыл ик уго верай ни – тй милям сюзлэмамы улйськоды. Тйледын валче улыны но, кулыны ми дасесь. ⁴Мон тйледлы туж оскиськисько, тйледын туж данъяськисько; трос куректон-кайгуосмы дыръя но мон тй пумысен буйгамын, шумпотонэн пачылмемын.

⁵Македония музъеме вуэммы бере, лулмы-сюзлэммы каньыллык шедьтытэк улйз; ми котыр ласянь ёртэмын вал: сьӧрласянь – керетон-даллашонъёс, нош асьмелэн сюзлэм пушкамы – кышкан-курданъёс улйзы. ⁶Нош востэмъёсты гажась-

* 6:17 Ис. 52:11.

жалясь Инмар милемыз шумпоттйз: ми доры Тит вуиз. ⁷Солэн вуэмезлы гинэ өвөл, но тйляд со сярысь сьолмаськемды понна но шумпотомы. Со милемлы вераз кызыы тйляд монэ адземды потэ, кызыы тй мон понна бөрдйськоды, кызыы тй мон сярысь сьолмаськиськоды. Та понна мон туж зол шумпотй. ⁸Соин ик, ыстэм гожтэтэным мон тйледыз жожомытй ке но, уг жаляськы. Ожытак жаляй, куке адзи, со ыстэм гожтэт өжыт дырлы ке но тйледыз жоже уськытйз шуыса. ⁹Табере мон шумпотйсько, – тй жоже усиды шуыса уг, но со понна: жоже усиды но өбкельыса сьöлыкьёстылэсь куштйськыны кутскиды. Жоже усиды ке но, Инмар понна жоже усиды. Озыен ми тйледлы нокыче но изьян өм вае. ¹⁰Уго Инмар понна жоже усён утиськонэ нуись өбкельыса сьöлыкьёслэсь куштйськонэз вордйськытэ, нош та дунне понна жоже усён – кулонэ нуэ. ¹¹Учке ук, Инмар понна жоже усёнды тй пушкын кыче тыршон, кыче шонере потон, кыче вожпотон, кыче кышкан, кыче мөзмон, кыче сьолмаськон, урод ужьёс понна кыче кылзэс юан вордйськытйз! Котькуд ласянь та ужын асьтэлэсь чылкыт луэмдэс тй возьматйды. ¹²Озыен, мон тйледлы гожтй ке но, ултйясь мурт понна но, ултйяськем мурт понна но ой гожты, но гожтй со понна: милям тй сярысь сьолмаськеммы Инмар азын тйледлы мед усьтйськоз шуыса.

¹³Соин ик, тйляд шумпотэмды понна ми но шумпотймы. Нош эшшо но зол шумпотймы Титлэн шумпотонэзлы, малы ке шуоно, тй ваньды

солэсь духсэ буйгатйды. ¹⁴Мон со азын тйледыз туж ушъяй ке но, но со понна мон возьытэ ой усьы. Ми тйледлы өрекчатэк, ваньзэ шонер вераллямы бере, озьы ик Тит азын ушъяськонмы юнме ой вал. ¹⁵Солэн лулыз-сюлмыз табере эшшо но зол тй пала берытске, кукке со тодаз вае, кызы тй солэсь верамзэ кабыл басьтйды, кызы тй сое мур гажаса, сюлэмдэс сётыса куно кариды. ¹⁶Шумпотйсько, котьмар пумысен но табере тйледлы оскиськыны быгатйсько ни шуыса.

8-тй ЛЮКЕТ

¹Агай-выньёсмы, Македонияысь черкъёслы Инмарлэн сётэм дэлетэз сярысь милям тйледлы ивортэммы потэ. ²Туж секытэсь куректон-кайгуос пöлын но соос шумпотонэн пачылмыса уло; туж куанер-начар улонзы дыръя но шырыт сямзэс возьмато. ³Мон ачим адзи, кызы соос нокин косятэк, көня быгатйзы, со мында юрттэт сётказы, солэсь но тросгес. ⁴Македонияысь вöсяськисьёс сюлмысьтызы куризы милемыз бичам юрттэтсэс басьтыны но милемын огазын Иерусалимысь вöсяськись калык понна юрттйськыса ужаны. ⁵Тазы луоз шуыса ми ум но оскиськиське вал. Соос асьсэзыз асьсэос, нырысь ик Кузё-Инмарлы, нош собере Инмарлэн эрикезлы тэрытскыса, милям ки уламы сётйзы. ⁶Соин ик Титэз ми куримы, таизэ но кутскем зеч ужзэ тй дорын мед быдэстоз шуыса. ⁷Тйляд ваньмыз тырмыт – ос-

конды но, кыллы устолыкты но, тодон-валанды но, тыршонды но, тйляд милемыз яратонды но. Озы бере, та ужады но шырыт сямоесь луэ.

⁸Косон та өвөл. Мукетъёслэн тыршонзы сярись вераса, тйляд яратондылэсь оскиськымон луонзэ эскерисько. ⁹Тй уго тодйськоды Кузё-Инмармылэсь Иисус Христослэсь гажан-жалянзэ. Со узыр вал, но тй понна начар луиз: Аслаз начар луонэныз тйледыз узыр карон понна. ¹⁰Та пумысен мон визь-кенеш сётйсько: со тйледлы пайда ваёз. Но кылем арысен ик ини сое мылкыдады возем гинэ өвөл, но сюлэмдэс поныса тае лэсьтыны кутскиды ини. ¹¹Нош табере кутскем уждэс пумозяз вуттэ ни. Мае сюлмысьтыды лэсьтыны мылкыд кариды, сое ас моçтыя быдэстыны тырше. ¹²Уго тйляд сюлмаськон-тыршонды вань ке, ваньлыктыя-моçтыя сётэм кузьымдэс Инмар кабыл бастоз, нош марды өвөл, сое Со кулэ уг кары. ¹³Озы луыны кулэ өвөл: огъёсызлы капчи мед луоз, нош тйледлы – секыт; ваньмызлы огкадь луыны кулэ. ¹⁴Та дыре тйляд мултэсшем ваньлыкты соослэсь өвөллыкэс тырмытонэ мынйз; нош бөрысь, кулэ ке луиз, соослэн мултэсшем ваньлыксы тйлесьтыд өвөллыктэс тырмытонэ мыноз, ваньмызлы огкадь луыны кулэ. ¹⁵Тазы гожтэмын:

”Кин трос бичаз, солэн мултэсэз ой вал;
нош кин ожыт бичаз,
солэн но ёрмон-зудонэз ой вал”.*

* 8:15 Исх. 16:18.

¹⁶Инмарлы тау, Титлэн но сюлмаз тй сярись сыће сюлмаськон-тыршон понэм понназ. ¹⁷Тит – сюлмо адыми, со ачиз мылкыд карыса, нокин косытэк тй доры мыныны потйз; милесьтым куронмес но пеляз понйз. ¹⁸Соин чшо одйгзэ братмес ыстйськомы. Зеч Иворез быгатыса тодытэмез понна, сое вань черкьёс ушьяло. ¹⁹Та зеч ужез быдэсьян дырмылы та братэз милемлы сьорами юрттйськыса ветлыны черкьёс бырйыса пуктйзы. Юрттэт бичанэз Кузё-Инмарлэн данэз понна быдэсьяськомы, зеч мылкыд карыса та бордын ми ужаськомы-тыршиськомы. ²⁰Чакласькиськомы но, – нокин но милемыз пыкылыны медаз быгаты таће уно коньдон люкаммы но сое кытчы кареммы пумысен. ²¹Ми уго Кузё-Инмар азын гинэ өвёл, адымиос азын но ваньмыз зеч мед луоз шуыса сюлмаськиськомы. ²²Соосын чшо мукетсэ братмес но ми ыстйськомы, солэсь тыршись луэмзэ трос пол, трос учырйёсы эскеримы ни. Со али эшшо но тыршисьгес луэмын, со уго тйледлы туж юн окиське. ²³Тит сярись ке верано, со – мынам эше, тй дорын чшо ужан муртэ; нош верано ке мукет агай-выньёсмы сярись, соос черкьёслэн ыстэм муртйёссы, Христослэн данэз. ²⁴Черкьёс азын возматэ-тодытэ ук асьтэлэсь со ыстэм муртйёсты яратэмдэс, мед тодозы, ми тйледыз юнме ум ушьяське шуыса.



9-тй ЛЮКЕТ

¹Вөсяськись калыклы юрттйськыса ужамды сярысь мултэс луоз мыным тйледлы гождьяны. ²Мон тодйсько уго тйлесытыд тыршемдэс, Македонияысь калык азын тйледыз ушьяса верай: "Ахаияысь вөсяськисьёс кылем арысен ик та ужлы дасесь вал ини". Тйляд тыршемды тросэзлэсь мылкыдзэс жутйз. ³Мон тй доры агай-выньёсты ыстйсько, – мынам тйледыз ушьяме юнме медаз луы. Кызьи мон верай ни, юрттэт люканлы тй дась луыны кулэ. ⁴Кукке монэн ёош Македонияысь адямиос лыктозы но адзозы тй дасесь өвөл шуыса, соку ми возытэ усёмы, тй сярысь уг ни вераськы, уго ми тйледыз ушьяса вераллямы. ⁵Соин ик агай-выньёсты мон куроно кариськи, тй доры мынам азыпалам мед мынозы но азьвыл ик мед сюлмаськозы, сйзьи са саламды зеч уж кадь дасямын мед луоз, кыскам-талам кадь медаз луы шуыса.

⁶Тани мар верало на: кин кидыссэ жаляса начар кизе, со начар аралоз но; нош кин кидыссэ жалятэк бусьтыр кизе, со бусьтыр аралоз но. ⁷Котькин но сюлмыз косэмья мед сётоз, жоже усыыса медаз, кужмысь карыса но сётоно медаз луы; уго зеч мылкыдын сётйсез Инмар яратэ. ⁸Инмар тйледыз котькыче дэлетэн узырмытыны быгатэ: котьку но, котьмаин но кётты тыр мед луоз, котькыче но зеч ужлы узыресь мед луоды, ⁹кызьи гождэмын:

”Со кураськисьёслы люкылйз;

солэн шонерлыкез пумтэм вапумъёс улэ”.*

¹⁰Кизисьлы кидыс сётйсь, сиыны нянь сётйсь, Со ик тйледлы кизыны трос кидыс сётоз, шонер улондылэсь емьшъёссэ йылэтоз. ¹¹Тй котьмалы но узыр луыса, зеч ужъёс лэсьтыны мед быгатоды, нош со ужъёсмы понна тросэз Инмарлы тау карозы. ¹²Малы ке шуоно, тйляд та быдэстоно ужды вöсьяськисьёслэсь зудыса улонзэс тыр гинэ карем öвöл, со ужды понна Инмар доры пумтэм трос тау карон кыльёс вуозы. ¹³Уго таёе ужан-тыр-шонэз адзыса, юрттэт басьтйсьёс Инмарлы тау каро, Христослэн Зеч Иворезлэсь куронъёссэ санэ поныса улэмды понна, соосын ваньмыныз лякыт сюлмын кусып воземды понна. ¹⁴Соос тй понна вöсьясько но сюлмынызы тй пала кыстйсько, уго тй бордын Инмарлэн туж бадзым дэлетэз пачылмыса улэ. ¹⁵Инмарлы тау Солэн вераны луонтэм бадзым зечлыкез понна!

10-тй ЛЮКЕТ

¹Мон, Павел, Христос кадь лякыт, гажась-жалась сюлэмо луэме потыса, тйледлы вазиськисько. Мон – со, кин тй пöлын улыкум зйбыт-востэм улйсь, нош палэнын дыръям – кышкасьтэм луись, озьы мон сярысь верало. ²Тйледыз курисько: дорады лыктэм берам юн кышкасьтэм луонме

* 9:9 Пс. 111:9.

возьматон дырозь эн вуттэ вал монэ, уго мон сыће сямме возьмато соослы, киньёс мон сярись малпало лулмугормылэн куроньёсызья ми улйськомы шуыса. ³Ми та дуннеын ик улйськомы ке но, нош та дуннелэн амальёсыныз ум ожмаськиське. ⁴Милям ожмаськон пычал-тйрлыкмы та дуннелэсь өвёл уго. Инмарлэн сётэм кужыменыз юнматэм изкаръёсты ми куашкатйськомы, кескич малпанъёсты таркаськомы, ⁵Инмарез тодонлы пумит султэм котькыће вылтйяськонэз, котькыће малпанэз Христослы тэрытскись карон понна, киуламы кутйськомы. ⁶Куке тйляд Христослы тэрытсконды йыг-йыг луоз, соку ми дась котькыће кылзйськытэк улонэз шымыртыны.

⁷Мар син азяды, со шоры учке. Христослэн муртэз луисько шуыса, кин аслыз ачиз оске, со ас понназ мед малпаськоз: ми но со кадь ик Христослэн адямиосыз луиськомы шуыса. ⁸Куашкатон понналы өвёл, кылдытон-лэсьтон понна Кузё-Инмарлэн сётэм кужыменыз эшшо но золгес мон ушьяськыны кутскысал ке, соку но мон возытэ ой усьысал. ⁹Медаз малпалэ мон тйледыз гожтэтъёсын кышкатьясько шуыса. ¹⁰Киньёс но соос шуо: "Гожтэтъёсызья со юн, кужмо луэ шуыса шөдоно, нош ачиз татын луыку – жаль шораз учкыны, кылыз но огшоры гинэ", – ¹¹кин тазы малпа, со мед тодоз: кычеесь ми гожтэтъёсамы тй дорын луымтэ дыръямы, сычеесь ик уж вылын тй дорын луон дыръямы.

¹²Ми уго ум дйсьтйське асьмемыз сыће муртъёсын артэ пуктыны яке чошатыны, киньёс асьсэ-

зыз асьсэос вылье пукто. Асьсэзыз ас мертэтэнызы мертаса, асьсэзыз асэнызы ёшатыса, – озьы соос асьсэлэсь визьмо луэмзэс уг возьматэ. ¹³Ми дурьстэм ум ушьяськиське. Ужан-тыршон понна милемлы Инмар инты сётйз. Тйляд но улон интыды со пушкы пыре. ¹⁴Соин ик Христос сярись Зеч Иворез тй доры ваимы, но со висьям интылэн межа сьораз ми өм потэ. ¹⁵Мукет муртъёслэн ужьёсынызы ми ортчыт ум ушьяськиське, но окиськиськомы, тйляд осконды пумен юнмамья, тй пöлын, Инмарлы та ужлы висьям интыяз, милям ужьёсмы эшшо паськыталозы. ¹⁶Соку ми тйляд улоно музеймёсты сьöрын но Евангелиез тодытыны быгатомы. Нош мукет шаеръёсын мукетъёслэн быдэстэм ужьёсынызы милемлы ушьяськыны кулээз өвөл. ¹⁷Ушьяськись мурт Инмарен мед ушьяськоз. ¹⁸Ярамон өвөл со, кин ассэ ачиз ушья. Ярамон со, кинэ Кузё-Инмар ушья.

11-тй ЛЮКЕТ

¹Э, мынэсьтым подтэм луэмме öжыт ке но чидасалды ке! Чидалэ монэ. ²Тй понна уго мон Инмарлэн сётэм сюлмаськонэныз сюлмаськисько, малы ке шуоно, мон тйледыз одйг гинэ Пимуртлы, Христослы курай. Со азе тйледыз, сьöлыкамтэ дун-чылкыт выль кенэз кадь дун-чылкыт карыса султытэме потэ. ³Но кышкасько, кызыы кескич амалэн кый Еваез öрекчаз, озьы ик тйляд но визьёсты медаз тугаське вал, Христослы дун-

чылкыт оскон бордысь медад палэнске вал. ⁴Уго кин ке но лыктыса мукет Иисус сярысь тодытыны кутске ке, кудйз сярысь ми өм тодытэлэ, яке мукет духез вае ке, кудзэ ми өм вае, яке мукет ”зеч иворез”, кудзэ ми өм тодытэ, – сыче муртъёсын тй туж тупаса улйськоды. ⁵Но мон малпасько, со ”вылй апостольёстылы” номырин но мон уг сётскы. ⁶Вераськон ласянь мон олокыче ик усто өвёл ке но, – со понна тодон-валанэ вань. Котьмар ласянь но ми тйледлы туж тодмоесь луиськомы.

⁷Тйледыз жутон понна, асме ачим ултйяса, Инмарлэсь Зеч Иворзэ тйледлы дунтэк-кузьымтэк тодытыса, оло нош, мон съöлык лэсьтй? ⁸Тйледлы юрттйськон понна, мукет черкёслэсь талам кадь уждун бичаса, соосты шуге-леке вуттылй. Тй дорын улыкум, ёрмонэ сюрый ке но, нокинлы но акыльтыса öй улы. ⁹Ёрмыса улыкум, монэ сюдйзы-вордйзы Македонияысь вуэм агай-выньёс; мон ачим но уго тырши, тыршисько но тйледлы акыльтытэк улыны. ¹⁰Христослэн нимыныз, кыл сётыса, зэмлыкез верасько: Ахаия шаерын та пумысен ушъяськемысь нокин но дугдытыны уз быгаты. ¹¹Малы? Оло мон тйледыз уг яратйськы шуыса-а? Инмар тодэ, кызы мон тйледыз яратйсько.

¹²Но кызы лэсьтй, озы ик лэсьто азыланяз но. Инмар ужез милемын одйг кадь лэсьтйськом шуисьёслы ушъяськыны муг уг сёты. ¹³Соос – öрекчи апостольёс, кескич ужасьёс. Христослэн апостольёсыз шуыса, асьсэды возъматыны тыршо ке но. ¹⁴Паймонэз өвёл: уго ачиз шайтан югытлэн

кылчинэз тусьем кариськыны быгатэ. ¹⁵Соин ик туж бадзым уж өвөл, шайтанлы ужасьёс асьсэды шонер улонлэн ужасьёсыз шуыса возьматыны тыршо ке. Но соослы пум вуоз, соос асьсэлэн ужзыя пунэмзэс басьтозы.

¹⁶Эшшо верало на: нокин но монэ визьзэ ыштэм мурт шуыса медаз лыдья. Озы малпаськоды ке, соку визьзэ ыштэм муртэ кадь ке но монэ кабыл басьтэ, öжыт ке но ушьяськыны мед быгатом шуыса. ¹⁷Мар али верасько, уг вераськы Кузё-Ин-марлэн сётэм эрикезья, зэмзэ но, визьзэ ыштэм мурт кадь, мон али ушьяськыса верасько. ¹⁸Кызы таяз дуннеын тросэз улйсьёс адями кадь асэнызы ушьясько, мон но ушьяськоно кариськи. ¹⁹Тй уго, визьмо-валась адямиос, нош ноқыче кариськытэк визьзэс ыштэмьёсты чидаса кылзйськиськоды. ²⁰Тй чидаськоды сое, кин тйледыз зйбет улэ пыртэ, кин тйлесьтыд люкеттэс сие, кин тйледыз талакыска, кин ассэ вылйе пуктэ, кин тйляд ымнырады мыжге-чабке. ²¹Возьдаськыса верано луисько: асьмелэсь кужымтэм луэммес возьматймы. Нош кин ке, маин ке ушьяськыны уг кышка, – визьзэ ыштэм мурт кадь верасько, – мон но дйсьтйсько ушьяськыны. ²²Соос еврейёс? Мон но еврей. Соос Израиль пиос? Мон но. Соос Авраамлэн кидысэз? Мон но. ²³Соос Христослэн ужасьёсыз? Визьме, оло, ыштй, но шуисько: ”Мон соослэсь зечгес ужась”. Мон соослэсь тросгес ужай-тырши, лыдьянтэм пол яраё, вось каремын вал; трос пол пытсэтьёсын монэ возизы, трос пол бырон калэ вуылй. ²⁴Иудейёс монэ вить пол кутскыса, куамын

укмыс пол ньӧрен шуккизы; ²⁵куинь пол кутскыса монэ бодыен жугизы; одйг пол изэн лэзьяса тышказы. Куинь пол корабль куашканэ-выёнэ учыралй, уй но нунал ёже зарезь ву вылын улоно луи. ²⁶Мон ялан сюрес вылын вал. Шуръёс вылын кышкыт учыръёсы сюрелй; йырвандйсьёслэсь, ас иудей калыкелэн лек муртъёсызлэсь, язычникъёслэсь кышкаса улоно луылй. Нош городъёсын, кыр дуннеосын, зарезь выльёсын кӧня чидано луылйз! Ӧрекчи агай-выньёс пӧлын но кӧня куректон-кайгу вал. ²⁷Ужаса, катътэммыса, ёем дырря изылытэк, сютэм, сю куасьмыса, ёем визяса, кезыт азын, гольык но кӧня улй?! ²⁸Вань та верам учыръёс сяна, мон доры нуналлы быдэ трос калык люкаське, вань черкъёс сярысь но мыным сюлмаськыны кулэ. ²⁹Кин ке но катътэммыку, мон уг катътэммыськы ке шат? Кин ке но визь сынаськонэ сюрюку, мон со понна тылын уг жуаськы ке шат? ³⁰Мыным маин ке но ушъяськыны кулэ ке, соку мон ушъясько аслам кужымтэм-кынартэм луэменым. ³¹Пумтэм вапумъёсы данъямын мед луоз Инмар, Кузё-Инмармылэн Иисус Христослэн Атаез, Со тодэ мон уг ӧрекчаськиськы шуыса. ³²Дамаскын дыррям, Арета эксэйлэн ёросэн кивалтйсез, Дамаскын монэ кутон понна возмаськыса улйз; нош монэ укноысен борддор кузя корзинае поныса лэзизы. Озы мон солэн ки улысьтыз мозмытскыны быгатй.

12-тй ЛЮКЕТ

¹Ушьяськыса мон но кыче но пайда уг бастйськы. Кузё-Инмарлэн сётэм адзоньёсыз, усътйськоньёсыз сярысь верало. ²Христослы оскись одйг адямиез тодйсько, кудйз дас ньыль ар талэсь азьвыл, мугорын-а – уг тодйськы, мугортэк-а – уг тодйськы: Инмар тодэ, куинетй инбаме жутэмын вал. ³Та адями сярысь тодйсько, уг гинэ тодйськы – мугорын-а, яке мугортэк-а: Инмар тодэ, – ⁴со рае жутэмын вал. Со кылйз вераны луонтэм кыльёсты, кудьёссэ адями кылын вераны уг луы. ⁵Таё адямиен ушьяськыны быгатйсько, нош асэным уг ушьяськы. Аслам ляблыкьёсыным гинэ ушьяськи ке ушьясько, шат. ⁶Шонерзэ вераса, ушьяськеме потйз ке, ушьясько, но мон визьме ыштэм мурт кадь соку уг луы, малы ке шуоно, зэмлыкез верало. Но мон уг ушьяськиськы. Мынам уг поты уго, мон солэсь умойгес луисько шуыса, сое малпатэме, кукке со монэ адёе яке кылэ. ⁷Мыным сыёе паймымонэсь адзоньёс усътэмын вал, но мон йырме укыр вылэ медам жуты шуыса, со понна мынам мугорам ши бышкалскиз – шайтанлэн кылчинэз – укыр медам вылтйяськы шуыса, монэ курадзытон понна. ⁸Куинь пол кутскыса мон Кузё-Инмарлы вёсяськи, монэ солэсь мед мозмытоз шуыса. ⁹Нош Кузё-Инмар мыным шуиз: ”Мынам гажан-жалянэ – со тыныд мед тырмоз, уго тон лябзыса улон дырья, Мынам кужыме юнгес шарае потэ”. Соин ик мон золгес аслам ляблыкьёсыным ушьяськисько, Христослэн кужыме мон пушкы

мед пыроз шуыса. ¹⁰Христос понна лябзыса, жожомонэ сюрыса, ёрмыса улыкум, улляса, жикатыса возыкузы шумпотыса улйсько: уго, куке мон лябземын, соку мон кужмо.

¹¹Визьме ыштэм мурт кадь мон аслым потйсько, уго тй монэ со калэ вуттйды. Тйледлы кулэ вал монэ ушьяны, уго со "вылй апостольёсын" ке чошатоно, мон номырин но соослэсь улйын өвөл, нокин ке но мон өвөл. ¹²Мынам апостол луонэ трос чиданьёс, паймымон тодметьёс, ужьёс, кужымьёс пыр тй пöлын возьматэмын вал. ¹³Мукет черкьёсын чошатыса, мар тйледлы уг тырмы? Со гинэ ке шат: тйледыз мон номырин ёртыса ой возы. Со понна монэ простить каре. ¹⁴Тани, мон куинетй ползэ тй доры лыктыны дасяськисько. Тйледыз ёртыса уг возы, мон уго тйлесьтыд ваньбурдэс уг утчаськы, тйледыз асьтэдыз утчасько. Нылпиос анай-атайёссылы ваньбур люканы кулэ өвөл, анай-атайёс нылпиослы ваньбур люканы кулэ. ¹⁵Маи мынам вань, сое шумпотыса сёткало, тйлесьтыд лулдэс утён понна номыртэк кылыны дась. Мон тйледыз туж яратйсько ке, нош тй монэ малы öжытгес яратыны кулэ? ¹⁶Шуомы, мон тйледыз ёртыса ой возы, но кескич адями кадь, кескич амалэн тйледыз ки улам басьтй. ¹⁷Тй доры ыстылэм адямиосы пыр басьтылй-а мон тйлесьтыд аслым барыш-люкет? ¹⁸Мон Титэз тй доры мыныны косй, соин чош агайвыньёс пöлысь одйг муртэ ыстй. Тит тйлесьтыд аслыз барыш-люкет басьтйз-а? Одйг духен ми соин öм улэ-а? Одйг сюрестй öм ветлэ-а?

¹⁹Эшшо уд малпаське на-а, ми тй азын ась-
 мемыз шонере поттыны гинэ выриськомы шуыса?
 Инмар азын, Христос понна ми вераськомы:
 ваньмыз та, гажаноосы, тйледыз визьман-нодьян
 понна. ²⁰Мон уго тани малэсь кышкасько: лыктэм
 берам медам адзы вал тйлесьтыд сыче луэмдэс,
 кыче луон дырдэс мон уг яратйськы. Озыы ик тй
 но монэ медад адзе сыче луыкум, кыче луон дыр-
 ме тй уд яратйське. Медам адзы вал тй пöлысь
 керетоньёсты, вожьяськоньёсты, лекьяськоньёсты,
 кыл сётканьёсты, кыл нуллоньёсты, урттылйсь-
 коньёсты, вылтйяськоньёсты, туркам-таркам рад-
 тэм улонэз. ²¹Лыктй ке, нош ик тй дорын Инмаре
 монэ кулэтэм медаз кары вал. Тй пöлысь тросэз
 понна мыным бöрдоно медаз луы вал, кудьёсыз
 азьвыл кырсь ужьёс лэсьтйзы, азыса-калгыса,
 юрзым ужьёс лэсьтыса улйзы, нош асьсэос öбке-
 лыса сьöлыкьёссылэсь öз куштйське.

13-тй ЛЮКЕТ

¹Куинетй ползэ тй доры лыктйсько ни. Кык яке
 куинь адзисьёслэн верам котькуд кылзылы ос-
 кыны луэ. ²Мон тйледлы верай ини, но эшшо ве-
 расько на, – кыкетй ползэ тй дорын улыкум кадь,
 нош али тйледлы палэнын улон дырьям гожьясь-
 ко, – уката ик соослы, кудьёсыз азьвыл сьöлыкаса
 улйзы, соосын чош мукетъёсызлы но: куинетй
 ползэ лыктй ке, огдэс но уг ни жаля. ³Мынам
 ымыным Христос вераське-а шуыса, тй монэ возь-

матыны куриськоды. Со тй понна кужымтэм өвөл, тй пöлын Со Аслэсьтыз кужымзэ возматэ. ⁴Кужымтэм дыръяз Со кортёогамын ке но вал, но Инмарлэн кужыменыз али но Со улэ. Ми но Со понна лябесь ке но, но Соин валче, тй понна, Инмарлэн кужыменыз улэп луомы.

⁵Асьтэдыз асьтэос чаклалэ-эскере: осконэн-а тй улйськоды? Асьтэдыз асьтэос эскере. Яке тй уд тодйське-а Иисус Христос тй пушкын улэ шуыса? Озыы ке өвөл, соку тй со эскерон-чакланэз ортчыны уд чидалэ. ⁶Нош ми сярысь ке верано, малпасько, тй тододы ми со эскеронэз чидаськомы шуыса. ⁷Тй ноқыче но урод ужъёс медад лэсьтэ шуыса, Инмарлы вöсяськиськомы. Со асьмеды кычөөсь луыны кулэмес возматон понна өвөл, тй зеч уж мед лэсьтоды шуыса вöсяськиськомы, – ми кычөөсь луыны кулэ, сычөөсь ум ке но адзйськиське тйляд син азяды. ⁸Зэмлыклы пумит мыныны милям кужыммы өвөл, но зэмлык понна ми кужмоесь. ⁹Ми шумпотйськомы, кукке ми кужымтэмесь, нош тй кужмоесь. Тйляд дун-шектэм луонды понна ми вöсяськиськомы. ¹⁰Со понна ик мон та гожтэтме тй дорын улымтэ дыръям гожьясько: тй доры вуэм берам кужымен юн сямо луэмме возматано медам луы шуыса. Со кужымез мыным Кузё-Инмар куашкатон понна өз, лэсьтон-кылдытон понна сётйз.

¹¹Агай-выньёсы, шумпотэлэ! Дун-шектэм луыны тырше, ог мылкыдын, тупаса улйсье луэлэ, – соку яратыса, тупаса улонлэн Инмарез тйледын валче

улоз. ¹²Святой чупанэн огдэс огды зечкылалэ. Ваньмыз вöсьяськисьёс тйледлы салам верало.

¹³Кузё-Инмарлэн Иисус Христослэн дэлэтэз, Инмар (Атайлэн) яратонэз, Святой Духлэн герзась улонэз тй пушкын мед улоз. Аминь.